

ROMANE PARAMICIA PHENDE KATAR I BIBI VETA



Promovarea **DIVERSITĂȚII**
ÎN CULTURĂ ȘI ARTĂ
în cadrul patrimoniului cultural european



Proiect finanțat printr-un Grant oferit de Norvegia, Islanda, Liechtenstein și Guvernul României.

www.povestinespuse.eu | www.romanobutiq.ro | www.eeagrants.org | www.fonduri-diversitate.ro

Basme povestite de Tanti Veta, culese de Alina Șerban

Mulțumiri pentru traducerea în română Prof.dr. Elena Radu

Ilustrație copertă: Simona Dumitriu

Paginație: Silviu Iacob

Editare text: Crenguța Mihailă

©2015 Romano ButiQ



Katar janes e paramicia?

Katar miri dei. Savorre şave kidenas pes trujal late, vaş voi sar jekh kahni kidelas amen truial late.

Acana...Kames te aşune vi tu jekh paramici?

Mulțumim, Tanti Veta!

Nais tuqe, Tanti Veta!



POVEŞTI NESPUSE

Punrorro kali bacriatar	03
O şavo kai sas les mila	06
Casa de lumânare şi casa de sare	10
I sovnakuni şai	14
E phuresche şai	17
Trin phenia	21
E raşesche şai	24

Punrorro kali bacriatar



*Kai sine e şaia?
Kai sine e şaia?*

Sasas jekhvar jekh phuro thai leschi romni, kaj sasas len trin şaia. Svaco andar e şaia abia barilesas. E şaia prandesas thai jivenas dur katar lenghe dada. Ando jekh ghes e juvli acili khamni. Tha, kana avilo o vaht te bianel, astardias te hatiarel pes but nasul. Palem thai palem mai nasul. Thai ci aştielas te biandel. Dineas mui le perutnen te ajutisarel lan. Dine mui le phuria. Thai dai e şaienghe katiarelas pes but mai nasul. Atunci o phuro traşanilo thai dineas mui pesche şaia te beşen penghe daia. O jekhto şaia avili thai lias pe daia ande angali. O duito avili vi voi thai lias pe daia ande angali. O trinto şai avili vi voi sigo, tha avili mai palem.

O dad holiasalo:

- Inklio avri, punrorro kali bakriatar, inklio avri! Sas tut ambiťia manča! Inklio avri! Me diniom tut mui te dihkes te daia thai tu avilean palem! Inklio avri!

I şai holiasali thai dineas pes rigate.

Androdova, i dai e şainghe astardias te hatiarel pes mai şukar. Palem cherdias jekh şaves. Loşaliatar i juvli hatiarelas pes şukar, vaş o şavo biandilo vi vov şukar, e dada mangle jekh vurdon, kasa te phiren andar o şavo foro le duien şaia, kai reslesas o jekhto.

Punrorro kali bakriatar ci sasas vi voi dini mui. Thai sar phirenas pesche phenia andar o foro, asaindos ando vurdon thai loşalindoi, jekhvar avilo jekh zmeo. Sar avilo o zmeo kerdias jekh baro, baro thu trujal e şaia thai lias le şaia lesa.

- Kai sine e şaia? Kai sine e şaia? Pucenas pen savore lumia.

Savorre manuşa andar o foro rodenas le şaia. O phuro rodelas vi vov pesche şaia. Tha ci mai arakhenas le şaia. Andar nişto andar i lumia ci mai arakhenas le şaia. Punrorro kali bakriatar sas vi voi holiardi thai mudarelas pes te janel kai si lache phenia. Pucindoi andar o foro arakhel che si aver lumia, telal o foro, ko şero jekhe haning. Jekh lumia manuşenţa thai zmeonenţa. Thai lache phenia sasas ciorde katar e zmeoia andar kodoia lumia, kai kamenas te astaren vi lan. Andar che o zmeo sas les dui phrala thai savorre phrala kamenas te prandezen svako andar e şaia.

Atunci o punrorro kali bakriatar dinias pes tele ande haning te rodel pesche phenia. Thai mardias pes thai mudardias pes le zmeonenţa. Sosas kadia de zoralı o punrorro kali bakriatar. Thai zoriardias i şai te marel savoren trin zmeonen. Palem lias pesche phenia ando vurdon thai phirde savorre trin andar o foro te barodivesaren. Vaş e dada sosas but loşale, savorre ştar şave, trin şaia thai o tikno şavo. Thai astarde jekh barodivesa thai dine mui savorren andar o foro.

*Semas vi me kothe. Haliom, piliom, dine man jekh thardimol thai jekh pechi mas. Kerdias amen te asas thai boldinioman mande khere. Thai te incheren godi: kololesche vi akana phenel pes kana jekh şai si zoralı **punrorro kali bakriatar**.*

O şavo kai sas les mila



*Tut sas tut mila mandar thai hastradian
man thai dinian man te hau.*

S

asas jekhvar jekh şavo. O dad e şavesche sasas bakriari thai sas les but bakri te dikel lendar. Kadia cke vov thai leschi dai jivenas şukar. Ando iech ghes o dad e şavesche mulo thai von acile bi bakrença. Thai sasas ciororre thai jivenas phares, sathai i dai thai o şavo cherenas phari buti ando svako ghes.

O şavo godisarelas sar te kerel, pasa ghes jalas ando veş thai cinelas kaşt te bichinel len. Tha sathai jalas thai kerelas buti ando veş sa na sas len love thai ci sas len hamos thai ci d-aştienas te jiven. O şavo sa godisarelas pes lesche dades thai so şukar sas len kana sas len but bacria kai rodenas pendar thai sas len savorendar. Kadia che ando iech ghes o şavo rughiel pesche daia te jal te liel nişte love uşle kai te chinel iech bacri, te bariarel lan, te cheren mai but thai te astarel te ovel vi vov bacriari. Iechtovar i dai ci kamli te mai cherel uşlimata tha o şavo rughisar dias lan thai rughisardias lan ji kana phendias ando gav thai astardias te liel love, iech şel gologania.

Thai ghelo o şavo ko diz te chinel i bacri. Thai sar jalas vov opro drom, ko iech truşul dromesco malavdias pes şavença mai but. Vas e şave astardesas iech saporro thai mudarelas les ieche caştores. E şavesche cherdias pes mila sapestar.

- *Na mai mudar le ticnore sapes, phendis lenghe o şavo. Te anesa manghe le tikne sapes thai cenas le sapes ando gono, dava tut mire gologania.*

- *Kozom gologania si tut? puşle o şave.*

- *Iech şel gologania. Dava tut sare te den manghe o tikno sap thai mukhel les.*

- *Şukar; das tut e tikne sapes andar iech şel gologania, e şave kamle.*

Atunci o şavo chindias le tiknes sapes, thai boldinias pes lesa ando gono khore thai pendis pesche daia so cherdias. Cite le tikne sapes ando kavanoz. So sas len hamasche denas vi lesche. Palem o sap barilo but baro andar o kavanoz, tha ciceas les ando iech turtum. So sas len hamasche denas vi les. Cana barilo but baro andar o turtum ciceas les ando kher. So sas len hamasche denas vi les. Ji kana o sap kerdilo balauro sar o kher.

Palem ando iech ghes o balauro dineas mui le şaves leste:

- *Tut sas tut mila mandar thai hastradian man thai dinian man te hau. Akana me som baro thai avilo o vaht te boldav man miri familiate.*
- *Sar te boldes tut? pucilias les o şavo. Me na janav kai si tiri familia thai sar te resau tire dadende.*

- *Uşti opre me zenende thai ghelav tut me urial. Pachiat ande mande.*

Thai uriardias o şavo ando zenia le balaurosoro opral plaia thai o haia, ji kana dihklia mai dur iech bari iag. Atunci o balauro dinias pes tele ande har thai garavdias pes thai phendias le şavesche che cothe, che bari iag si pesche dada. Te jal lende thai te phenel lenghe che vov janel kai si o tikno balauro de butv vaht naşavdo. Orso cherela thai orso phardela, te phenena kai si ji kana lesco dad na del lesche o iachardo barorro telal i cib. Gelo o şavo ko dad le balaurosco thai pendias lenghe che janel kai si lengo şavo kai akana barilo baro, tha na phenel lenghe ji kana na del lesche o iachardo barorro. E dada e balaurosco vicisarde thai phardinesarde tha o şavo ci phendias lenghe khanci. Ji kana o dad e balaurosoro kamlo thai dinias les o iachardo barorro telal i cib. Atunci o şavo phendias lenghe kai si o şavo lengoro thai ghelo pesche khore. I balaurosoro familia acile loşale.

Reslo khere pesche daia, o şavo phendias so cherdias thai vardienas o dui jene ko iachardo barorro. Thai sas len bokh, thai godisarenas te han. Sar aşundias o iachardo barorro che si lenghe bokh, sigo avile opre meseli ceare thai but lacimata. Vaş katar kodoia ghes orso kamenas o şavo thai leschi dai o iachardo barorro denas lenghe so kamenas von.

Semas vi me kothe thai haliom, piliom, lença thai dikhliom o iachardo barorro.

Kher Loniatar thai Kher Momeliatar



*Aj, phurie, mukh vi man te beşav paşal tute
ando sovthan telal i ucardi, te avas khetanes.*

S

asas iechvar iech phuro thai iech phuri kai sasas cingarde. Thai svaco andar lende beşenas ande pesco kher. Le phures sas les iech kher loniatar toko lesco, vaş le phuria sas lan iech kher momeliatar toka laco. Andi iech ghes i phuri kerelas habe thai trebula lache lon.

Kana avilo o şavo katar i şcola dinias lesche mui late thai phendias lesche te jal ko phuro te maghel iech tîra lon. Trebulas lache te kerel haviç thai kadia kerel pes, thol pes lon andi pani. O şavo naşlo ko phuro tha o phuro ciceas les avri:

- *Nuş atharkhal, av le benghesco, ci dav tut lon!*

O duito ghes i phuri pala trebulas lache lon. Trebulas lache te kerel haviç thai kadia kerel pes, thol pes lon andi pani. Kana avilo katar i şcola o şavo bicialdias les palem ko phuro, te manghel lon. Tha o phuro ci kamlo thai viciardias ko şavo:

- *Nuş atharkhal, av le benghesco, ci dav tut lon!*

O trinto ghes i phuri kamelas palem te kerel haviç thaj trebulas lache lon. Sar avilo o şavo katar i şcola phendias lesche te jal ko phuro, te manghel lon. O trinto var ghelo o şavo tha o phuro ci kamlo thai palem viciardias:

- *Nuş atharkhal, av le benghesco, ci dav tut lon!*

Kana boldinias pes o şavo o trinto var thai phendias le phuriache che o phuro sa na kamel te del lache lon, i phuri holiasali thai dinias avri thai rughisali te del iech bari brişind kai te biandiol o kher e phuresco. Thai avilo iech baribal thai iech baro brişind thai biandilo o kher e phuresco.

Thai acilo o phuro bi kheresco. Atunci naşlo ki phuri thai rugisadias lan te mukhel vi les ande peschi kher:

- *Ai, phurie, mukh vi man te beşav tute ando kher, ando iech kunj paşal o udar.*

I phuri sasas holiardi thai na kamelas thai naşavdias les le rovliasa.

O phuro acilo avri. Palem ghelo o dujto var chi phuri:

- *Ai, phurie, mukh vi man te beşav tute ando kher, ando iech kunj paşal o udar.*

I phuri sasas holiardi thai na kamelas thai naşavdias les le rovliasa.

O phuro acilo avri. Palem ghelo o trinto var chi phuri:

- *Ai, phurie, mukh vi man te beşav tute ando kher, ando iech kunj paşal o udar.*

I phuri sasas holiardi tha kerdias pesche mila lestar thai mukhlias les.

O phuro acilo te sovel ando kunj paşal o udar. Tha sas lesche şil thai astardias te roghiel pes phuriatar:

- *Ai, phurie, mukh vi man te beşav tute ko punre, che si manghe şil.*

I phuri sasas holiardi thai na kamelas thai naşavdias les le rovliasa. O phuro acilo te sovel ando kunj paşal o udar. Palem o duito ghes ghelo chi phuri:

- *Ai, phurie, mukh vi man te beşav tute ko punre, che si manghe şil.*

E phuriache kerdias pesche mila lestar thai mukhlias les andi soba, te sovel ko punre lachere.

O phuro tha sa na sas loşalo thai kamelas te sovel paşal i phuri.

- *Aj, phurie, mukh vi man te beşav paşal tute andosovthan telal i ucardi, te avas khetanes.*

I phuri sasas holiardi thai na kamelas thal naşavdias les avri le rovliasa.

O dujto ghes ghelo palem chi phuri:

- *Aj, phurie, mukh vi man te beşav paşal tute andosovthan telal i ucardi, te avas khetanes.*

I phuri sasas holiardi thai na kamelas thal naşavdias les avri le rovliasa.

O trinto ghes ghelo palem chi phuri:

- *Aj, phurie, mukh vi man te beşav paşal tute andosovthan telal i ucardi, te avas khetanes.*

I phuri holiasali thai ciceas le phures avri andar pesco kher. Thai beşelas o phuro avri thai rughisalo te avel iech bari tatipen te biandel savoro kher momeliatar e phuriachi. Thai avili iech bari tatipen thai iech zoralo kham, biandilo savorro kher e phuriaco.

Kadia acile solo duj bi kheresco. Ghele te jiven e şavesa ando iech ṭahra, opro umal, ko rig e forosco. Thai acana na sas ni ieches kher, ni le phures, ni le phuria. Ghele ko veş thai alosarde solo duj te keren penghe iech kher khetanes. Semas vi me kothe thaj ajutisardem len. Thodiom vi me iech kaşt, ciatriardiom, thodiom phuv.

Thai avilom thai phendiom tumenghe acana.

I sovnakuni şai



Kadaia na-i melalimata, lace manus'a!

S

asas iechvar iech phuro thai iech phuri. Sas len but şave, şave kai kamle len but thai kai barile bare. Andi iech ghes i phuri acili khamni. Solo dui lajanile thai garavde o per katar penghe şave thai katar e manuşa andar o gav. Faielas lenghe che sas but phure thai but ciororre te avena lenghe şave. Kana avilo o vaht e juvliaco te biandel, avili opre lumia iech şai. E dada rodenas latar ciorial thai inkerenas lan dur katar e iacha e lumiache.

I şai na sas iech aciarutni. Kana asalas but luludia inklionas andar o mui lacoro, kadia de şukar sas, tha kana jalas inklionas busuiocos telal o talpa lachere, kadia bahtali sasas. Iechvar po kurko i dai inkalelas lan avri te thovela thai te cangliarel lan. Sosas holi che i şai sas but melali thai sar thovelas lan celas i melali pani ando iech kunj andar i bar. Tha atunci kana thovela lan peschi dai i şai na mukhelas melalimata, tha sovnakai ando pani, kadia uji sas. Tha i dai na dikhelas che sighiarelas thai dikhelas lan melali, sighiarella te thovela, te garavela palem thai palem te zvîrciel i pani ando iech kunj andar i bar.

O phuro jalas pasa ghes thai kerelas buti ieche baro manus, kaş te ovel len hamos thai sia so trebulas lenghe ando kher le phuria tha vi le şαι. Andi iech ghes o baro manus pucilias le phures sostar besel kadia opro godia thai biasaindoi. Thai o phuro phendias lesche andar i garavdi şai, sar von si phure thai ciororre te ovel len iech kadia tici şai thai che si lenghe lajao.

Thai inkeren lan garavdi andi iech soba thai numa iechvar opro kurko lachi dai inkalela avri te thovel lan. Thai rovelas pes o phuro che i şai si but melali thai che iech kototor andar i bar aciol melali melaliasa cai aciol palal so thovel le şaia. Iech biaciarutni melalipen, kai varvar strafinel. Kana aşundias o baro manus kadia, rodutro, kamlo vi vov te dikhel. Thai avindoi ko phuro thai chi phuri, ando than e melaliaco, so te dikhes?

Sovnakaia punjia kidenesas ando saviri bar.

- *Kadaia na-i melalimata, lace manus!* Si ujo sovnakai, phendias lenghe o phuro.

Thai loşardias pen o phuro thai i phuri thai naşle sigo te inkalen le şaia andar i soba. Thai ciumidenas lan thai angalelas lan. Thai i şai asalas thai asalas perenas luludia andar o mui lacoro thai loşarelas pes naşindoi andar i bar thai inklionas busiocos telal o talpes lachere.

Semas vi me kothe thai piliom thai loşaniliom savorrenja chi hora andar o gav thai e şukarni thai bahtali şai.

E phuresche şai



*Iech kaliarno thai iech angarno, aci mosa
thai na mai phen!*

Sasas iechvar iech phuro thai iech phuri. Sas len dui şave, iech şai thai iech şavo. E daden dichenas but catar e şave. Andi iech ghes o phuro mulo. I phuri acili corcori thai dichelas catar e şave , te ovel len sia so trebulas lenghe, te jan chi şcola thai te avela şucar. Andi iech ghes nasfalili thai ȳidelas te merel i phuri. Dinias mui le şaves thai phendias lesche cadia:

- *Şavoreia, te dices te pheniatar, si ticni. Te cangliares lan, te cheres lache ciurea, te gheles lan chi şcola, te anes lan catar i şcola. Te ovel tut i mila lachiri, phendias lesche i phuri.*

- *Va daio, dudales, si man iech pheniori, sar te na dichav latar?*

Palem i phuri muli. O şavo thai i şai acile corcore. O şavo cherelas buti, ghelelas pe pheniorea chi şcola, lelas lan catar i şcola, dichelas latar. Sa cherdias cadia, iech vaht. Andi iech ghes o şavo prinjiardias iech şai cai cialiolas lestar thai manglia lachi musi.. Cadia jivile palem o şavo thai leschi romni thai leschi phen. E romni e şavesche acili chamni thai cherdias ieche şaves. Savorre jivenas chetanes.

Andi iech ghes avili iech patrin cai acharelas len chi iech barodives. I romni e şavesche phendias lesche che mai şuker mukhen e şaven chere thai jan o dui jene co barodives. Acanatar i phen e şavesche sasas mai bari thai d-aştielas te dichel catar o ticno şavores. Thai anglal te jan i romni lias le ticnes şavoren thai chidinias les meniatar ji cana mudardias les, palem muclias les andi cuna. Thai phendias che sovel o ticno, te na del andre leschi phen thai te uştiarel les, te jal te chelel pesche godiver.

Palem o rom thai i romni gheletar co barodives. I phen e şavesche cheldias pesche asainli avre şavenţa opral o drom. Cana ji cana mai jalas te dichel e şaves cai phenesas che sovel thai rodelas te na uştiarel les. Cana boldine pen e romen catar o barodives, bari holi thai nasulipen. I romni sicavdias e romesche le ticnore şaves mulo thai phendias lesche che leschi phen mudardias les. Atunci o şavo lias pesche phenia ando veş thai cindias lache musia le toveresa, muclias lan cothe thai boldinias pes che leschi romni.

Bari holi so sas andi laco ilo. Sosas ciororri ji co Devel. Jalas korkori andar o veş, sas lache pares. Andi iech ghes andar o veş naclias iech thagaresco şavo cai sas co ataripen jivutre. Thai cana dicias e şaia duchlianilo lache. Thai lias lan leste che duchalas lache. Cana dicias i thagarni so şai andias chere o şavo, iech şai bimusiache, holiasali thai manglias lesche te cela avri. Tha o şavo incherelas but late thai na camlias:

- Daio, te cies lan avri, cies vi man. Cherava me sia so trebul lache, dichav me latar.

I thagarni na camlias te naşavel pesco şaves, cadia che na mai phendias khanci. Palal iech vaht i şai acili chamni. O şavo sosas dino mui te jal co mudaripen. I şai holiasali zorales thai godisarelas sar te cherel savorenţa bi lescoro. O şavo phendias lache te besel godiaver che leschi dai kam dichela latar. Cana avilo o vaht te biandel, cherdias iech şaves. Tha i thagarni na mai camelas te besel lenţa thai ciceas le şaia avri andar o cher le şavesa.

Gheli i şai opro drom, şavesa. Holi thai ciorori. Sar jalas voi le şavesa palal late, achardias opro iech iachardi plai. Ando maşcar e plaiesco, sosas iech haning. I şai muclias e şaves ando ciar thai gheli chi haning. E şaiache sas lache truş thai delas trui chi truiali chi haning. Sar paşanili catar i haning thai piel pani, sar bariol lache e musia pale.

Thai cana boldel pes co şavoro, arachel les bariardo thai sasto. Thai loşali lias pesco şaves ande angali. Thai ciumidelas les thai phenelas lesche sari lachi jivipen: sar mule lache dada, sar acili e phralesa, sar sasas doşali che mudardias e ticne şavores thai sar sas andi ando veş, sar o phral lacoro cindias lache e musia, sar aracliala e thagaresco şavo thai sar sas citi avri. O ticoно şavo aşunelas thai asalas.

Thai asaindoi thai ghelindoi o dui jene aresle ieche iachardi jivutrenghe cher, cai sas iech muialno

*Phiravne manusा
Con nachiol katarchal
Te del andre thai te hal*

I şai sasas loşali, d-aştielas te del le ticne şaves te hal. Savore lumia phirenas pen şukar le şavoresa thai dichenas lestar. Thai sar beşelas i şai cothe nachle dui soldaturia. Dichindoi lan corcori le şavesa pucilias lan so si lasa, sar resli voi cothe. I şan na camelas te phenel. Tha o tikno şavoro astrdias te phenel sia.

- *Iech kaliarno thai iech angarno, aci mosa thai na mai phen,*
phenelas lesche pohalea i şai.

Tha o şavo asalas thai phenelas sia so phendiasas lesche i şai.

- *Iech kaliarno thai iech angarno, aci mosa thai na mai phen,*
phenelas lesche pohalea i şai.

Tha o şavo asalas thai phenelas sia so phendiasas lesche i şai.

- *Iech kaliarno thai iech angarno, aci mosa thai na mai phen,*
phenelas lesche pohalea i şai.

Tha o şavo asalas thai phenelas sia so phendiasas lesche i şai. Thai sar agorisardias o şavo i paramici o dui soldaturia sicavde pen. Thai sicavdias pes che iech sas o phral lacoro thai aver o rom lacoro. Solo dui mangle pesche iertisaripen catar i şai che na dichle mişto latar. Thai jivile chetanes atunciatar loşale savorenţa, vaş o şavoro asalas thai loşarelas pes so sas o ghes de baro.

*Thai semas vi me cothe thai aşundiom i paramici, vaş acana
phenava la vi tumenghe.*

Trin phenia



*Te lies man, cherava tuche dui şave,
dui jamenia!*

S

asas iechvar trin phenia. E phenia sasas bare thai trebulas te prandezen. E phenia phirenas o ghes andar o ghiz thai loşarenas pen andar o phiraipen. Ando iech ghes avilo iech thagaresco şavo andar o ghiz. Thai dichindoi codolen trin phenia cialiolesche lendar thei pucilia len savi andar lende te liel lan romniatar.

- *Te lies man avesa barvalo, cherava tut iech baro cher, phendias o iechto şai.*

- *Na-i man nevoia, phendias e thagaresco şavo, si vi man barvalipen.*

- *Te lies man cam hasa laci hamos pasa ghes, me dava tut o lon andar o haben, phendias o duito şai.*

- *Na-i man nevoia, phendias e thagaresco şavo, si vi man lon.*

- *Te lies man, cherava tuche dui şave, dui jamenia, phendias vi o trinto şai.*

- *Tut cam lava tut, phendias e thagaresco şavo, te cheresa manghe şave.*

Phendo thai cherdo, prandesalo e thagaresco şavo e şaisasa. Palal iech vaht i şai acili chamni. Cana avilo te biandel, i şai cherdias dui jamenia, iech şavo thai iech şai. I thagarni, cai na camelas le şaia, phendias e roben te cioren e şaven catar i şai thai te paruven len duien jucendar. Palem phendias e robesche te jal te mudaren e şaven ando veş. E robesche sas lesche mila şavendar, na mudardias len thai muclias len ando veş. I thagarni phendias savorenghe che i şai biandili dui şave thai phendias te ovela paruvdi co udar e tharipnaco. Vaş palem thodias iech muialni: con nachel catar o udar te ciungarel i juvli cai biandili juclioren.

Acile e şavore corcore ando veş. O şavo dichelas pe pheniatar thai jalas pasa ghes te rodel hamos. I şai jivelas andi iech cher-ruch cai cherdes lan solo dui. O Devel incherelas lenţa thai ajutienas len te jiven. Ando svaco riat o Devel cherelas pes iech phuro thai avelas te dichel şaiatar thai dumavelas lasa.

Andi iech ghes aşundias pes co thagaripen che atunci cana nachenas andar o veş e grasta na camenas te pien pani andar o paniardo andar o vaş. Aşunindo kadia o thagarno ghelo co veş te dichel so si. Thai ando veş diclias i şai andar o ruch cai garavelas pes. E grasta traşanas catar i şai thai na mai pienas pani. O thagar dinias palem mui e şaiache te del pes tele andar o ruch, tha i şai na camelas bi lacoro phral. O trinto gin o thagar phendias e şaiache te del pes tele andar o ruch. Atunci avilo palem o phuro Devel thai phendia e şaiache sar te cherel: *te ajucherel te avel o phral lacoro, te liel lasa iech hoiagoro paniesa cai khandel mişto thai te jal savore caring o thagaripen ando vurdon. Palem cana resen la udar e thagaripesco te den pen tele, te del hoiagoresa paniesa cai khandel mişto opral i dei lengoro thai te phenen savori lenghi paramici thai sar von si lachere şave.*

Ji codova vaht avilo vi o phral lacoro chere. Uştine o dui şave co thagarno ando vurdon thai chetanes ghele caring o thagaripen. Resle cothe co udar e tharipnasco e şave mangle te den pen tele thei cothe cite opral i dei lenghere hoiagoro paniesa cai khandel mişto, paşal caste nachenas savore manuşa thai ciungarenas. Palem astardias i şai te phenel savori lenghi paramici. Sar lias pesco dad pe daia. Sar i dei lenghiri biandili thai sar i thagarni ciceas len avri. Thai sar von barile corcore thai boldinepen te phenen o ceacipen. Thai savori lumia dineas ceacipen e şavenghe vaş acana savori familia dineas iech bari sinia thai pile thai asanile.

Thai semas vi me cothe thai asaniliom lenţa.

E raşesche şai



*Tu dinean man cai me na camliom.
Na aşundian man.*

Leche raşaies sas les iech şai. I şai sas godiaver thai chelelas pes savoro vaxt e mai laci amalinasa. Chetanes beşenas, croşetienas thai denas dumă savoro ghes. Pohalea-pohalea, cherdile bare. Ando iech ghes o raşai phendias te jal pesche po svaco divesa. O raşai muclias e şaia chere pesche amalinasa. Co riat dine andre deşudui ciora. I amalin e şaiachi daranili thai naşlias. I şai e raşeşchi inclisti anglal e ciora:

- *Mişto araclem tumen, te thav tumenghe te han thai te pien,* phendias lenghe i şai.

Sasas zorali, but zorali. Hanas thai pienas o ciore thai asanas. Cana, agorisardias pes o mol. I şai e raşesche phendias lenghe che jal andi telalsoba palal mol. Cana resli andi telalsoba, garavdias pes palal o udar thai incaldias i bari ciuri. Palal iech vaht o şero e ciorenge dichias che na mai avel i şai pimasa.

- *Ja ta dich so cherel codoia şai e moliasa,* phendias o şero co iechto cior.

Del pes tele corcoro andi telalsoba o iechto cior, sar nachel i rig e udaresco i şai cinel lesche şero le ciureasa.

Palal iech vaht o şero e ciorenge dichel che na mai avel e pimasa.

- *Ja ta dich so cherel codoia şai e pimasa,* phendias o şero e ciorenge co duito cior.

Del pes tele corcoro o duito cior andi telalsoba, sar naclias i rig e udaresco i şai cinel lesche şero le ciureasa.

- *Ja ta dich so cherel codoia şai e pimasa,* phendias o şero e ciorenge co trinto cior.

Del pes tele corcoro o trinto cior andi telalsoba, sar naclias i rig e udaresco i şai cinel lesche şero le ciureasa.

Palal iech vaht o şero e ciorenghe dichel che na mai avel o piben. Thai cadia, bicialel e cioren iech palal avreste andi telalsoba palal pibe. Vaş i şai e raşesche, iech po iech cinelas len le ciureasa. Ji cana acilo corcoro o şero e ciorenghe. Holiardo, pachianilo che savore manuşa dinepen tele palal moliate, pile thai matile. Dineas pes tele vi vov. I şai dineas les le ciureasa thai cherdias lesche opro mui iech semnom, tha ci astardias te mudarel les. Naşlo o şero e ciorenghe.

I şai acili mosa thai na phendias nichasche so sas. Palal iech vaht, o şero e ciorenghe boldel pes co raşai thai manghel lesche i şai te ovel pesche romni. O raşai camlo thai ghelo te phenel e şaiache. Vaş i şai na camelas, thai na camelas, prinjiardias les e ciorenghe şero palal o semno. Tha lacoro dad na aşunelas lan thai camelas te prandescherel lan. Rughisardias pes lestar te aşunel lan, tha vov na aşunelas lan. Cadia che i şai peli thai gheli e ciorenghe şeresa.

Cana resli chere e ciorenghe şero, cadava camlo te mudarel lan. Sar diclias i şai so camel te cherel naşli. Thai naşli thai naşli, e ciorenghe şero thai e manuşa palal late. Ji cana che iech truşul dromesche inclisto lache deşudui vurdona ceareasa. Garavdias pes i şai ando deşudui vurdon. O şero e ciorenghe reslo vi vov co truşul e dromesco thai diclias e vurdona. Thai phendias e manuşeşnghe te bolden e vurdona e ceareasa cai nachen paşal lende. Thai dine tele o iechto vurdon, i şai na sas cothe. Thai dine tele o duito vurdon, i şai na sas cothe. Thai dine tele vi o trinto vurdon, i şai na sas cothe. Sa cadia, ji cana dine tele deşuiech vurdona. Co palem vurdon o şero e ciorenghe thai lesche manuşa, chine thai holiame, mucle le vurndonores te nachiol:

- *Dineam tele deşuiesch vurdona, chineleam. I şai na-i cathe, naşavdiam lan, phendias o şero e ciorenghe.*

I şai beşti garavdi ando clear ji cana o vurdon resli chere pesche dades. Thai dineas andre opro udar, thai lias pe dades ande angali, ciumideas les thai phendias lesche:

- *Na camliom te dav tiri duma palem dade, tha me semas but duchaini. Tu dinean man cai me na camliom. Na aşundian man.*

Thai phendias i şai e raşeşchi savore sode voi naclias, sar zorian dias savoren corcori.

Thai semas vi me cothe thai aşundiom i paramici e şaiache thai incherdiom e ciorenghe garavipen andar i telalsoba ji aghes.

AGOR



povestinespuse.eu



Povești Nespulse - Untold Stories

PA17/RO13-SP35/2015

Romano ButiQ

Proiect finanțat prin PA17/RO13 – Promovarea diversității în cultură și artă în cadrul patrimoniului cultural European

Mecanismul Financiar SEE 2009-2014



Promovarea DIVERSITĂȚII
în CULTURĂ ȘI ARTĂ
în cadrul patrimoniului cultural european



Proiect finanțat printr-un Grant oferit de Norvegia, Islanda, Liechtenstein și Guvernul României.

www.povestinespulse.eu | www.romanobutiq.ro | www.eeagrants.org | www.fonduri-diversitate.ro